

大般若波羅蜜多經卷第四百十三

唐三藏法師玄奘奉 詔譯

第二分無縛解品第十五

爾時具壽善現。白佛言。世尊。如說菩薩摩訶薩被大乘鎧者。云何菩薩摩訶薩被大乘鎧。佛告善現。若菩薩摩訶薩。能被布施乃至般若波羅蜜多鎧。是爲菩薩摩訶薩。被大乘鎧。若菩薩摩訶薩。能被四念住乃至八聖道支鎧。是爲菩薩摩訶薩。被大乘鎧。若菩薩摩訶薩。能被內空乃至無性自性空鎧。是爲菩薩摩訶薩。被大乘鎧。若菩薩摩訶薩。乃至能被如來十力

乃至十八佛不共法鎧。是爲菩薩摩訶薩被大乘鎧。若菩薩摩訶薩。能被一切智道相智一切相智鎧。是爲菩薩摩訶薩被大乘鎧。若菩薩摩訶薩。能自變身如佛形像。放大光明照三千界。乃至十方殑伽沙等諸佛世界。與諸有情作饒益事。是爲菩薩摩訶薩被大乘鎧。復次。善現。若菩薩摩訶薩。被如是等諸功德鎧。放大光明照三千界。乃至十方殑伽沙等諸佛世界。亦令諸界六種變動。謂動極動等極動等。爲諸有情作大饒益。善現。是爲菩薩摩訶薩被大乘鎧。復次。善現。若菩薩摩訶薩。能被布施波羅蜜多大功德鎧。

普化三千大千世界如吠瑠璃亦化自身爲大輪王。七寶眷屬無不圓滿諸有情類須食與食須飲與飲須衣與衣須乘與乘塗香末香燒香花鬘房舍臥具醫藥燈燭眞珠金銀及餘種種珍寶資具隨其所須悉皆施與作是施已復爲宣說六到彼岸相應之法令彼聞已終不墜墮至得無上正等菩提常不捨離六到彼岸相應之法善現是爲菩薩摩訶薩被大乘鎧善現如幻師或彼弟子住四衢道對大眾前化作種種貧乏有情隨其所須皆化施與於意云何如是幻事爲有實不善現荅言不也世尊佛告善現諸

菩薩摩訶薩。亦復如是。能被布施波羅蜜多大功德。鎧。或化世界如吠瑠璃。或化自身爲輪王等。隨有情類所須。施與。及爲宣說。六到彼岸相應之法。如是菩薩雖有所爲。而無其實。何以故。諸法性相皆如幻故。復次。善現。若菩薩摩訶薩。自被淨戒波羅蜜多大功德。鎧。爲有情故。生輪王家。紹輪王位。富貴自在。安立無量百千俱胝那庾多眾。於十善業道。或四靜慮。四無量。四無色定。或四念住。乃至八聖道支。或空無相無願解脫門。或佛十力。乃至十八不共法。亦爲宣說如是諸法。令其安住。至得無上正等菩提。於如是

法常不捨離。善現。是爲菩薩摩訶薩。被大乘鎧。善現。如工幻師。或彼弟子。住四衢道。對大眾前。化作無量百千有情。令其安住十善業道。乃至十八佛不共法。於意云何。如是幻事。爲有實不。善現。荅言。不也。世尊。佛告善現。諸菩薩摩訶薩。亦復如是。爲有情故。生輪王家。紹輪王位。富貴自在。安立無量百千俱胝那庾多眾於十善業道。乃至十八佛不共法。如是菩薩雖有所爲。而無其實。何以故。諸法性相。皆如幻故。復次。善現。若菩薩摩訶薩。自被安忍波羅蜜多。大功德鎧。亦勸無量百千俱胝那庾多眾。令被安忍波羅蜜多。

大功德鎧。善現。云何菩薩摩訶薩。自被安忍波羅蜜。多大功德鎧。亦勸無量百千俱胝那庾多眾。令被安忍波羅蜜。多大功德鎧。善現。若菩薩摩訶薩。從初發心。至得無上正等菩提。被安忍鎧。常作是念。假使一切有情之類。皆持刀杖來見加害。我終不起一剎那頃忿恨瞋心。勸諸有情亦修是忍。善現。是菩薩摩訶薩。如心所念。皆能成辦。乃至證得一切智智。常不捨離。如是安忍。亦令有情修如是忍。善現。是爲菩薩摩訶薩。被大乘鎧。善現。如工幻師。或彼弟子。住四衢道。對大眾前。化作種種諸有情類。或持刀杖更相加害。

或有相勸修安忍行。於意云何。如是幻事爲有實不。善現荅言。不也世尊。佛告善現。諸菩薩摩訶薩亦復如是。自被安忍波羅蜜多大功德鎧。亦勸無量百千俱胝那庾多眾。令被安忍波羅蜜多大功德鎧。如是菩薩雖有所爲而無其實。何以故。諸法性相皆如幻故。復次善現。若菩薩摩訶薩。自被精進波羅蜜多大功德鎧。亦勸無量百千俱胝那庾多眾。令被精進波羅蜜多大功德鎧。善現云何菩薩摩訶薩。自被精進波羅蜜多大功德鎧。亦勸無量百千俱胝那庾多眾。令被精進波羅蜜多大功德鎧。善現。若菩薩摩訶薩。

以一切智智相應作意。大悲爲首。身心精進。斷諸惡法。修諸善法。亦勸無量百千俱胝那庾多衆。修習如是身心精進。乃至證得一切智智。常不捨離。如是正勤。善現。是爲菩薩摩訶薩。被大乘鎧。善現。如工幻師。或彼弟子住四衢道。對大眾前。化作種種諸有情類。自修精進。亦勸他修。於意云何。如是幻事爲有實不。善現。荅言。不也。世尊。佛告善現。諸菩薩摩訶薩。亦復如是。以一切智智相應作意。大悲爲首。自修精進。亦勸有情。令修精進。如是菩薩雖有所爲。而無其實。何以故。諸法性相皆如幻故。復次。善現。若菩薩摩訶薩。

自被靜慮波羅蜜多大功德。鎧亦勸無量百千俱胝。那庾多眾。令被靜慮波羅蜜多大功德。鎧善現。云何菩薩摩訶薩。自被靜慮波羅蜜多大功德。鎧亦勸無量百千俱胝那庾多眾。令被靜慮波羅蜜多大功德。鎧善現。若菩薩摩訶薩。住一切法平等定中。不見諸法。有定有亂。而常修習。如是靜慮波羅蜜多。亦勸有情修習。如是平等靜慮。乃至證得一切智智。常不捨離。如是靜慮善現。是爲菩薩摩訶薩。被大乘鎧善現。如工幻師。或彼弟子。住四衢道。對大眾前。化作種種諸有情類。令修諸法平等靜慮。亦相勸修。如是靜慮。

於意云何。如是幻事。爲有實不。善現答言。不也世尊。佛告善現。諸菩薩摩訶薩。亦復如是。住一切法平等定中。亦勸有情修如是定。如是菩薩雖有所爲而無其實。何以故。諸法性相皆如幻故。復次善現。若菩薩摩訶薩。自被般若波羅蜜多大功德鎧。亦勸無量百千俱胝那庾多眾。令被般若波羅蜜多大功德鎧。善現云何菩薩摩訶薩。自被般若波羅蜜多大功德鎧。亦勸無量百千俱胝那庾多眾。令被般若波羅蜜多大功德鎧。善現。若菩薩摩訶薩。住無戲論甚深般若波羅蜜多。不得諸法若生若滅。若染若淨。此彼差別。

亦勸無量百千俱胝那庾多眾。安住如是無戲論慧。善現。是爲菩薩摩訶薩。被大乘鎧。善現。如工幻師。或彼弟子住四衢道。對大眾前。化作種種。諸有情類。令自安住。無戲論慧。亦令勸他住如是慧。於意云何。如是幻事。爲有實不。善現。荅言。不也。世尊。佛告善現。諸菩薩摩訶薩。亦復如是。自能安住。無戲論慧。亦勸有情住如是慧。如是菩薩。雖有所爲。而無其實。何以故。諸法性相。皆如幻故。復次。善現。若菩薩摩訶薩。被如上說。諸功德鎧。觀察十方。殑伽沙等諸佛世界。一切有情。有諸有情。攝受邪法。行諸惡行。是菩薩摩訶薩。

以神通力。自變其身徧滿。如是諸佛世界。隨彼有情。所樂示現。自現修行布施淨戒安忍精進靜慮般若。波羅蜜多。亦勸他行布施淨戒安忍精進靜慮般若。波羅蜜多。勸諸有情行此行已。復隨類音。爲說六種。波羅蜜多相應之法。令彼聞已。乃至證得一切智智。常不捨離。如是妙法。善現。是爲菩薩摩訶薩。被大乘。鎧。善現。如工幻師。或彼弟子住四衢道。對大眾前。化作種種諸有情類。令自安住。六到彼岸。亦令勸他安住此法。於意云何。如是幻事。爲有實不。善現。荅言。不也。世尊。佛告善現。諸菩薩摩訶薩。亦復如是。普於十

方。旻伽沙等諸佛世界。自現其身。隨宜安住。六到彼岸。亦勸有情。令住此行。常不捨離。如是菩薩。雖有所爲。而無其實。何以故。諸法性相。皆如幻故。復次。善現。若菩薩摩訶薩。被如上說諸功德鎧。以一切智智相應作意。大悲爲首。用無所得而爲方便。利益安樂一切有情。不襍聲聞獨覺作意。是菩薩摩訶薩。不作是念。我當安立爾所有情於布施等波羅蜜多。爾所有情不當安立。但作是念。我當安立無量無數無邊有情於布施等波羅蜜多。不作是念。我當安立爾所有情於內空等。爾所有情不當安立。但作是念。我當安

立無量無數無邊有情於內空等。不作是念。我當安立爾所有情於四念住等。爾所有情不當安立。但作是念。我當安立無量無數無邊有情於四念住等。不作是念。我當安立。爾所有情於空解脫門等。爾所有情不當安立。但作是念。我當安立無量無數無邊有情於空解脫門等。不作是念。我當安立。爾所有情於佛十力等。爾所有情不當安立。但作是念。我當安立無量無數無邊有情於佛十力等。不作是念。我當安立爾所有情於預流果等。爾所有情不當安立。但作是念。我當安立無量無數無邊有情於預流果等。不

作是念。我當安立爾。所有情於佛無上正等菩提。爾所有情不當安立。但作是念。我當安立無量無數無邊有情於佛無上正等菩提。善現。是爲菩薩摩訶薩。被大乘鎧。善現。如工幻師。或彼弟子住四衢道。對大眾前。化作種種諸有情類。其數無量。隨其所應。方便安立。令住布施。乃至令住諸佛無上正等菩提。於意云何。如是幻事爲有實不。善現。荅言。不也。世尊。佛告善現。諸菩薩摩訶薩。亦復如是。以一切智智相應作意。大悲爲首。用無所得而爲方便。安立無量無數無邊諸有情類。令住布施。乃至無上正等菩提。如是菩

薩雖有所爲而無其實。何以故。諸法性相皆如幻故。爾時善現白佛言。世尊。如我解佛所說義者。諸菩薩摩訶薩。不被功德鎧。當知是爲被大乘鎧。何以故。以一切法自相空故。所以者何。世尊。色乃至識。色乃至識相空。眼處乃至意處。眼處乃至意處相空。色處乃至法處。色處乃至法處相空。眼界乃至意識界。眼界乃至意識界相空。色界乃至法界。色界乃至法界相空。眼識界乃至意識界。眼識界乃至意識界相空。眼觸乃至意觸。眼觸乃至意觸相空。眼觸爲緣所生諸受。乃至意觸爲緣所生諸受。眼觸爲緣所生諸受乃至意

觸爲緣所生諸受相空。布施波羅蜜多乃至般若波羅蜜多。布施波羅蜜多乃至般若波羅蜜多相空。四念住乃至八聖道支。四念住乃至八聖道支相空。內空乃至無性自性空。內空乃至無性自性空相空。如是乃至佛十力乃至十八不共法。佛十力乃至十八不共法相空。菩薩摩訶薩。菩薩摩訶薩相空。被大功德鎧。被大功德鎧相空。世尊。由是因緣。諸菩薩摩訶薩。不被功德鎧。當知是爲被大乘鎧。佛告善現。如是如是。如汝所說。善現。當知一切智智無造無作。一切有情亦無造無作。諸菩薩摩訶薩爲此事故。被

大乘鎧。具壽善現。白言。世尊。何因緣故。一切智智無造無作。一切有情亦無造無作。諸菩薩摩訶薩爲此事故。被大乘鎧。佛告善現。由諸作者不可得故。一切智智無造無作。一切有情亦無造無作。所以者何。善現。色非造非不造。非作非不作。受想行識非造非不造。非作非不作。何以故。色乃至識畢竟不可得故。善現。眼處非造非不造。非作非不作。耳鼻舌身意處非造非不造。非作非不作。何以故。眼處乃至意處畢竟不可得故。善現。色處非造非不造。非作非不作。聲香味觸法處非造非不造。非作非不作。何以故。色處乃

至法處畢竟不可得故。善現。眼界非造非不造。非作非不作。耳鼻舌身意識界非造非不造。非作非不作。何以故。眼界乃至意識界畢竟不可得故。善現。色界非造非不造。非作非不作。聲香味觸法界非造非不造。非作非不作。何以故。色界乃至法界畢竟不可得故。善現。眼識界非造非不造。非作非不作。耳鼻舌身意識界非造非不造。非作非不作。何以故。眼識界乃至意識界畢竟不可得故。善現。眼觸非造非不造。非作非不作。非作非不作。耳鼻舌身意識界非造非不造。非作非不作。何以故。眼觸乃至意識界畢竟不可得故。善現。眼觸爲緣所

生諸受非造非不造。非作非不作。耳鼻舌身意觸爲緣所生諸受非造非不造。非作非不作。何以故。眼觸爲緣所生諸受。乃至意觸爲緣所生諸受。畢竟不可得。故善現。我非造非不造。非作非不作。有情命者。生者。養者。士夫。補特伽羅。意生。儒童。作者。受者。知者。見者。非造非不造。非作非不作。何以故。我乃至見者。畢竟不可得。故善現。夢境非造非不造。非作非不作。響像。幻事。光影。陽燄。空花。尋香城。變化事。非造非不造。非作非不作。何以故。夢境乃至變化事。畢竟不可得。故善現。內空非造非不造。非作非不作。外空。內外空。

空空。大空。勝義空。有爲空。無爲空。畢竟空。無際空。散
無散空。本性空。自共相空。一切法空。不可得空。無性
空。自性空。無性自性空。非造非不造。非作非不作。何
以故。內空乃至無性自性空。畢竟不可得故。善現。四
念住非造非不造。非作非不作。四正斷。四神足。五根
五力。七等覺支。八聖道支。非造非不造。非作非不作。
何以故。四念住乃至八聖道支。畢竟不可得故。善現。
如是乃至如來十力。非造非不造。非作非不作。四無
所畏。四無礙解。大慈。大悲。大喜。大捨。十八不共法。
非造非不造。非作非不作。何以故。如來十力乃至十

八佛不共法畢竟不可得故。善現。眞如非造非不造。非作非不作。法界。法性。法定。法住。實際。非造非不造。非作非不作。何以故。眞如乃至實際畢竟不可得故。善現。菩薩摩訶薩。非造非不造。非作非不作。如來應正等覺。非造非不造。非作非不作。何以故。菩薩摩訶薩。如來應正等覺。畢竟不可得故。善現。一切智。非造非不造。非作非不作。道相智。一切相智。非造非不造。非作非不作。何以故。一切智。道相智。一切相智。畢竟不可得故。善現。由此因緣。一切智。智無造無作。一切有情亦無造無作。諸菩薩摩訶薩爲此事故。被大乘

鎧。善現。由此義故。諸菩薩摩訶薩。不被功德鎧。當知是爲被大乘鎧。爾時具壽善現。白佛言。世尊。如我解佛所說義者。色無縛無解。受想行識無縛無解。時滿慈子。問善現言。尊者說色無縛無解。說受想行識無縛無解耶。善現荅言。如是如是。我說色無縛無解。說受想行識無縛無解。滿慈子言。何等色無縛無解。何等受想行識無縛無解。善現荅言。如夢色無縛無解。如夢受想行識無縛無解。如響。如像。如光影。如陽燄。如幻事。如空花。如尋香城。如變化事。色無縛無解。如響乃至如變化事。受想行識無縛無解。何以故。如是

一切色乃至識。無所有故。無縛無解。遠離故。無縛無解。寂靜故。無縛無解。無生故。無縛無解。無滅故。無縛無解。無染故。無縛無解。無淨故。無縛無解。復次。滿慈子。過去色無縛無解。過去受想行識無縛無解。未來現在色無縛無解。未來現在受想行識無縛無解。何以故。如是一切色乃至識。無所有故。無縛無解。遠離故。無縛無解。寂靜故。無縛無解。無生故。無縛無解。無滅故。無縛無解。無染故。無縛無解。無淨故。無縛無解。復次。滿慈子。善色無縛無解。善受想行識無縛無解。不善無記色無縛無解。不善無記受想行識無縛無

解。何以故。如是一切色乃至識。無所有故。無縛無解。遠離故。無縛無解。寂靜故。無縛無解。無生故。無縛無解。無滅故。無縛無解。無染故。無縛無解。無淨故。無縛無解。復次。滿慈子。世閒色無縛無解。世閒受想行識無縛無解。出世閒色無縛無解。出世閒受想行識無縛無解。何以故。如是一切色乃至識。無所有故。無縛無解。遠離故。無縛無解。寂靜故。無縛無解。無生故。無縛無解。無滅故。無縛無解。無染故。無縛無解。無淨故。無縛無解。復次。滿慈子。有漏色無縛無解。有漏受想行識無縛無解。無漏色無縛無解。無漏受想行識無縛無解。

縛無解。何以故。如是一切色。乃至識。無所有故。無縛
無解。遠離故。無縛無解。寂靜故。無縛無解。無生故。無
縛無解。無滅故。無縛無解。無染故。無縛無解。無淨故。
無縛無解。復次。滿慈子。一切法。無縛無解。何以故。以
一切法。無所有故。遠離故。寂靜故。無生故。無滅故。無
染故。無淨故。無縛無解。復次。滿慈子。布施。波羅蜜多。
無縛無解。淨戒。安忍。精進。靜慮。般若。波羅蜜多。無縛
無解。何以故。以布施等。波羅蜜多。無所有故。遠離故。
寂靜故。無生故。無滅故。無染故。無淨故。無縛無解。復
次。滿慈子。內空。無縛無解。外空。內外空。空空。大空。勝

義空。有爲空。無爲空。畢竟空。無際空。散無散空。本性
空。自共相空。一切法空。不可得空。無性空。自性空。無
性。自性空。無縛無解。何以故。以內空等無所有故。遠
離故。寂靜故。無生故。無滅故。無染故。無淨故。無縛無
解。復次。滿慈子。四念住無縛無解。四正斷。四神足。五
根。五力。七等覺支。八聖道支。無縛無解。何以故。以四
念住等無所有故。遠離故。寂靜故。無生故。無滅故。無
染故。無淨故。無縛無解。復次。滿慈子。如是乃至如來
十力無縛無解。四無所畏。四無礙解。大慈。大悲。大喜
大捨。十八不共法。無縛無解。何以故。以十力等無

所有故。遠離故。寂靜故。無生故。無滅故。無染故。無淨
故。無縛無解。復次。滿慈子。一切菩薩摩訶薩行無縛
無解。諸佛無上正等菩提無縛無解。何以故。以菩薩
行等無所有故。遠離故。寂靜故。無生故。無滅故。無染
故。無淨故。無縛無解。復次。滿慈子。一切智無縛無解。
道相智。一切相智無縛無解。何以故。以一切智等無
所有故。遠離故。寂靜故。無生故。無滅故。無染故。無淨
故。無縛無解。復次。滿慈子。眞如無縛無解。法界。法性。
不虛妄性。不變異性。平等性。離生性。法定。法住。實際
無縛無解。何以故。以眞如等無所有故。遠離故。寂靜

故。無生故。無滅故。無染故。無淨故。無縛無解。復次。滿
慈子。菩薩摩訶薩。無縛無解。如來應正等覺。無縛無
解。何以故。以菩薩摩訶薩。如來應正等覺。無所有故。
遠離故。寂靜故。無生故。無滅故。無染故。無淨故。無縛
無解。復次。滿慈子。一切有爲。無縛無解。一切無爲。無
縛無解。何以故。以有爲。等無所有故。遠離故。寂靜故。
無生故。無滅故。無染故。無淨故。無縛無解。滿慈子。諸
菩薩摩訶薩。於如是。無縛無解。微妙法門。以無所得
而爲方便。應如實知。滿慈子。諸菩薩摩訶薩。於如是
無縛無解。布施波羅蜜多。乃至般若波羅蜜多。四念

住乃至一切相智。以無所得而爲方便。應勤修學。滿
慈子。諸菩薩摩訶薩。以無所得而爲方便。應住如是
無縛無解。布施波羅蜜多。乃至般若波羅蜜多。四念
住乃至一切相智。滿慈子。諸菩薩摩訶薩。以無所得
而爲方便。應成熟無縛無解。有情。應嚴淨無縛無解
佛土。應親近供養無縛無解諸佛。應聽受無縛無解
法門。滿慈子。是菩薩摩訶薩。常不遠離無縛無解諸
佛。常不遠離無縛無解神通。常不遠離無縛無解五
眼。常不遠離無縛無解諸陀羅尼。常不遠離無縛無
解諸三摩地。滿慈子。是菩薩摩訶薩。當起無縛無解

道相智。當證無縛無解一切智一切相智。當轉無縛無解法輪。當以無縛無解三乘法要。安立無縛無解諸有情類。滿慈子。若菩薩摩訶薩。修行無縛無解六波羅蜜多。能證無縛無解一切法性。無所有故。遠離故。寂靜故。無生故。無滅故。無染故。無淨故。無縛無解。滿慈子。當知是菩薩摩訶薩。名被無縛無解大乘鎧者。

第二分三摩地品第十六之一

爾時具壽善現。白佛言。世尊。何等是菩薩摩訶薩大乘相。齊何當知菩薩摩訶薩發趣大乘。如是大乘從

何處出。至何處住。如是大乘爲何所住。誰復乘是大乘而出。佛告善現。汝初所問。何等是菩薩摩訶薩。大乘相者。善現。六波羅蜜多是菩薩摩訶薩。大乘相云何爲六。謂布施波羅蜜多。淨戒波羅蜜多。安忍波羅蜜多。精進波羅蜜多。靜慮波羅蜜多。般若波羅蜜多。善現。云何布施波羅蜜多。若菩薩摩訶薩。以一切智智相應作意。大悲爲首。用無所得而爲方便。自捨一切內外所有。亦勸他捨內外所有。持此善根。與一切有情同共迴向一切智智。善現。是爲菩薩摩訶薩布施波羅蜜多。善現。云何淨戒波羅蜜多。若菩薩摩訶

薩以一切智智相應作意。大悲爲首。用無所得而爲方便。自受持十善業道。亦勸他受持十善業道。持此善根。與一切有情同共迴向一切智智。善現。是爲菩薩摩訶薩淨戒波羅蜜多。善現。云何安忍波羅蜜多。若菩薩摩訶薩以一切智智相應作意。大悲爲首。用無所得而爲方便。自具增上安忍。亦勸他具增上安忍。持此善根。與一切有情同共迴向一切智智。善現。是爲菩薩摩訶薩安忍波羅蜜多。善現。云何精進波羅蜜多。若菩薩摩訶薩以一切智智相應作意。大悲爲首。用無所得而爲方便。自於五波羅蜜多。勤修不

捨亦勸他於五波羅蜜多勤修不捨。持此善根。與一切有情同共迴向一切智智。善現。是爲菩薩摩訶薩。精進波羅蜜多。善現。云何靜慮波羅蜜多。若菩薩摩訶薩。以一切智智相應作意。大悲爲首。用無所得而爲方便。自方便善巧。入諸靜慮無量無色。終不隨彼勢力受生。亦能勸他方便善巧。入諸靜慮無量無色。不隨彼定勢力受生。持此善根。與一切有情同共迴向一切智智。善現。是爲菩薩摩訶薩。靜慮波羅蜜多。善現。云何般若波羅蜜多。若菩薩摩訶薩。以一切智智相應作意。大悲爲首。用無所得而爲方便。自如實

觀察一切法性。於諸法性無取無著。亦勸他如實觀
察一切法性。於諸法性無取無著。持此善根。與一切
有情同共迴向。一切智智。善現。是爲菩薩摩訶薩。般
若波羅蜜多。善現。當知是爲菩薩摩訶薩。大乘相。復
次。善現。菩薩摩訶薩。大乘相者。謂內空。外空。內空。
空空。大空。勝義空。有爲空。無爲空。畢竟空。無際空。散
無散空。本性空。自共相空。一切法空。不可得空。無性
空。自性空。無性自性空。云何內空。內謂內法。卽是眼
耳鼻舌身意。當知此中眼由眼空。非常非壞。乃至意
由意空。非常非壞。何以故。本性爾故。善現。是爲內空。

云何外空。外謂外法。卽是色聲香味觸法。當知此中色由色空。非常非壞。乃至法由法空。非常非壞。何以故。本性爾故。善現。是爲外空。云何內外空。內外謂內外法。卽內六處及外六處。當知此中內法由內法空。非常非壞。何以故。本性爾故。善現。是爲內外空。云何空空。空謂一切法空。此空復由空空。非常非壞。何以故。本性爾故。善現。是爲空空。云何大空。大謂十方。卽東西南北四維上下。當知此中東方由東方空。非常非壞。乃至下方由下方空。非常非壞。何以故。本性爾故。善現。是爲大空。云何勝

義空。勝義謂涅槃。當知此中涅槃由涅槃空。非常非
壞。何以故。本性爾故。善現。是爲勝義空。云何有爲空。
有爲謂欲界色界無色界。當知此中欲界由欲界空。
非常非壞。色無色界由色無色界空。非常非壞。何以
故。本性爾故。善現。是爲有爲空。云何無爲空。無爲謂
無生無滅無住無異。當知此中無爲由無爲空。非常
非壞。何以故。本性爾故。善現。是爲無爲空。云何畢竟
空。畢竟謂若法究竟不可得。當知此中畢竟由畢竟
空。非常非壞。何以故。本性爾故。善現。是爲畢竟空。云
何無際空。無際謂無初後際可得。當知此中無際由

無際空。非常非壞。何以故。本性爾故。善現。是爲無際空。云何散無散空。散謂有放有棄有捨可得。無散謂無放無棄無捨可得。當知此中散無散由散無散空。非常非壞。何以故。本性爾故。善現。是爲散無散空。云何本性空。本性謂若有爲法性。若無爲法性。如是一切皆非聲聞獨覺菩薩如來所作。亦非餘所作。故名本性。當知此中本性由本性空。非常非壞。何以故。本性爾故。善現。是爲本性空。云何自共相空。自相謂一切法自相。如變礙是色自相。領納是受自相。取像是想自相。造作是行自相。了別是識自相。如是等若有

爲法自相。若無爲法自相。是爲自相。共相謂一切法共相。如苦是有漏法共相。無常是有爲法共相。空無我是一切法共相。如是等有無量共相。當知此中自共相由自共相空。非常非壞。何以故。本性爾故。善現。是爲自共相空。云何一切法空。一切法謂五蘊十二處十八界。有色無色。有見無見。有對無對。有漏無漏。有爲無爲。是爲一切法。當知此中一切法由一切法空。非常非壞。何以故。本性爾故。善現。是爲一切法空。云何不可得空。不可得謂此中求諸法不可得。當知此中不可得。由不可得空。非常非壞。何以故。本性爾。

故善現。是爲不可得空。云何無性空。無性謂此中無少性可得。當知此中無性由無性空。非常非壞。何以故。本性爾故。善現。是爲無性空。云何自性空。自性謂諸法能和合自性。當知此中自性由自性空。非常非壞。何以故。本性爾故。善現。是爲自性空。云何無性自性空。無性自性。謂諸法無能和合者性。有所和合自性。當知此中無性自性由無性自性空。非常非壞。何以故。本性爾故。善現。是爲無性自性空。復次。善現。有性由有性空。無性由無性空。自性由自性空。他性由他性空。云何有性由有性空。有性謂有爲法。此有性

由有性空。云何無性。由無性空。無性謂無爲法。此無性由無性空。云何自性。由自性空。謂一切法皆自性空。此空非智所作。非見所作。亦非餘所作。是謂自性。由自性空。云何他性。由他性空。謂一切法若佛出世。若不出世。法住法定。法性法界。法平等性。法離生性。眞如不虛妄性。不變異性。實際。皆由他性故空。是爲他性。由他性故空。善現。當知是爲菩薩摩訶薩大乘相。

大般若波羅蜜多經卷第四百十三

音釋

花鬘

鬘莫班切

補特伽羅

梵語也或云福伽羅或富特伽羅此云數取趣謂數數往

來諾趣也